

1. ԻՆՉՊԵՍ ՊԵՏՔ Է ՀԱՃԱԽԵԼ ԵԿԵՂԵՑԻ

Յուրաքանչյուր ճշմարիտ քրիստոնյայի պարտքն է հաճախել եկեղեցի, հատկապես կիրակի և տոն օրերին մասնակցելու Սբ. Պատարագի արարողությանը: Եկեղեցին աղոթքի տուն է և մոմ վառելը եկեղեցի հաճախելու պարտադիր պայման չէ, կարևորը աղոթքն է և համապատասխան կանոնների պահպանումը:

1. Եկեղեցի մտնելիս պետք է խաչակնքվել:
2. Եկեղեցի մտնելիս պետք է լինել մարմնապես ու հոգեպես մաքուր, սթափ մտքով:
3. Եկեղեցի պետք է մտնել պատշաճ և վայելուչ հագուստով (սպորտային հագուստով կամ կիսավարտիքով չի կարելի մտնել եկեղեցի):
4. Տղամարդիկ եկեղեցի պետք է մտնեն գլխաբաց, կանայք՝ գլուխները գլխաշորով ծածկած:
5. Արգելվում է հարբած վիճակում եկեղեցի մտնել:
6. Արգելվում է զենքով եկեղեցի մտնել:
7. Եկեղեցի պետք է մտնել անաղմուկ, զգույշ քայլերով:
8. Եկեղեցում պետք է պահպանել կատարյալ լռություն, բարձրաձայն չաղոթել, չգրուցել:
9. Անջատել բջջային հեռախոսները:
10. Սուրբ Խորանի, Սուրբ Ավագանի և սրբապատկերների առջև մեջքով չկանգնել, կանգնել միշտ դեպի արևելք՝ հայացքը ուղղած դեպի Սուրբ Խորանը:
11. Եկեղեցում ձեռքերը գրպանը չդնել:
12. Ծեսի ընթացքում քահանայի աղոթքի, Սուրբ Ավետարանի ընթերցման և հավատամքի ժամանակ պետք է ոտքի կանգնել:
13. Սուրբ Խաչը կամ Սուրբ Ավետարանը համբուրելուց առաջ պետք է ասել Մեղայ Աստուծոյ՝ և խաչակնքվել:
14. Եկեղեցուց դուրս գալիս շրջվել դեպի Սուրբ Խորանը, խոնարհվել և խաչակնքվել:

ԿԻՐԱԿՆՕՐՅԱ ԸՆԹԵՐՑՈՒՄՆԵՐ


2 Կորնթացիներ 13 , 5-13

Քննեցէ՛ք դուք ձեզ՝ տեսնելու, թէ նոյն հաւատի մէ՞ջ էք. փորձեցէ՛ք դուք ձեզ. չգիտէ՞ք, թէ Քրիստոս Յիսուս ձեր մէջ է, այլապէս կը լինէիք անպիտան: ⁶Բայց յոյս ունեմ, թէ կ'իմանաք, որ մենք անպիտան չենք: ⁷Եւ աղաչում ենք Աստծուն, որ չարը ձեզ բան չանի. ո՛չ որպէսզի մենք ընտիր երեւանք, այլ որպէսզի դուք բարին գործէք, հոգ չէ, թէ մենք անպիտան թուանք. ⁸քանի որ չենք կարող հակառակել ճշմարտութեանը, այլ պաշտպան ենք ճշմարտութեան: ⁹Ուրախ ենք, երբ մենք տկար ենք, եւ դուք զօրաւոր էք: Նոյն բանի համար էլ աղօթում ենք, որ դուք հաստատուն լինէք: ¹⁰Ուստի հեռուից գրում եմ այս բանը, որ, երբ գամ, խստութեամբ չվարուեմ Տիրոջ ինձ տուած իշխանութեամբ, որ շինելու համար է եւ ոչ՝ քանդելու: ¹¹Եւ վերջապէս, եղբայրնէ՛ր, ո՛րջ եղէք, հաստատո՛ւն մնացէք, մխիթարուեցէ՛ք, միաբա՛ն եղէք, խաղաղութի՛ն արէք. եւ խաղաղութեան ու սիրոյ Աստուածը թող լինի ձեզ հետ: ¹²Ողջո՛յն տուէք միմեանց սուրբ համբոյրով. բոլոր սրբերը ողջունում են ձեզ: ¹³Մեր Տէր Յիսուս Քրիստոսի շնորհը, Աստծու սէրը եւ Սուրբ Հոգու հաղորդութիւնը ձեզ հետ լինեն: Ամէն:



Մարկոսի Ավետարան 11, 27-33

²⁷ու ասացին նրան. «Ի՞նչ իշխանութեամբ ես դու այդ անում, եւ ո՞վ տուեց քեզ այդ իշխանութիւնը»: ²⁸Յիսուս պատասխան տուեց եւ ասաց նրանց. «Ես էլ ձե՛զ մի բան հարցնեմ, պատասխանեցէ՛ք ինձ, եւ ես ձեզ կ'ասեմ, թէ ինչ իշխանութեամբ եմ այս անում: ²⁹Յովհաննէսի մկրտութիւնը երկնքի՞ց էր, թէ՞ մարդկանցից. պատասխանեցէ՛ք ինձ»: ³⁰Նրանք իրար միջեւ խորհում էին ու ասում. «Եթէ ասենք՝ երկնքից, մեզ կ'ասի՝ իսկ ինչո՞ւ նրան չհաւատացիք. ³¹իսկ եթէ ասենք՝ մարդկանցից, ժողովրդից ենք վախենում». որովհետեւ բոլորը գիտէին, թէ Յովհաննէսը մարգարէ էր: ³²Պատասխան տուեցին եւ Յիսուսին ասացին՝ չգիտենք. եւ Յիսուս նրանց պատասխանեց ու ասաց. «Ես էլ ձե՛զ չեմ ասի, թէ ինչ իշխանութեամբ եմ այս անում»:



| ՄՈՍԿՎԱՅԻ ՀԱՅ ԿԱԹՈՂԻԿԵ ԵԿԵՂԵՑՈՒ ԿԻՐԱԿԼՕՐՅԱ ԴՊՐՈՑԻ ԱՇԽԱՏԱՆՔԱՅԻՆ ԺԱՄԱՆԱԿԱՑՈՒՅՑ | | |
|---|------------------|---|
| 1. | 12:00 - 12:45 | Հայոց Պատմության /երիտասարդներ |
| 2. | 13:00 - 13:45 | Հոգևոր դաս /երիտասարդներ (Ծ.Վրդ. Պետրոս Պետրոսյան) |
| 3. | 14:00 - 14:45 | Հայոց լեզու /երիտասարդներ (Ա.Գևորգյան) |
| 4. | 15:00 - 15:45 | Հայոց լեզու ավագ ենթախումբ (Ա.Գևորգյան) |
| | | Խոսքի զարգացում կրտսեր ենթախումբ (Վ.Ասատրյան) |
| 5. | 16:00 - 16:45 | Հայոց լեզու կրտսեր ենթախումբ (Ա.Գևորգյան) |
| | | Խոսքի զարգացում ավագ ենթախումբ (Վ.Ասատրյան) |
| 6. | 17:00 - 17:30 | Զարգացնող խաղեր (երգ, ոտանավոր, հեքիաթի ընթերցում) (Վ.Ասատրյան, Ա.Գևորգյան) |

**ՄՈՍԿՎԱՅԻ ՀԱՅ ԿԱԹՈՂԻԿԵ ԵԿԵՂԵՑՈՒ ԿԻՐԱԿՆՕՐՅԱ
ԴՊՐՈՑ**

2008թ. ի վեր Մոսկվայի հայ կաթողիկե եկեղեցու կիրակնօրյա դպրոցը հայ ոսկեդենիկ լեզուն հասանելի է դարձնում հայրենիքից հեռու հայազգի մանուկներին և երիտասարդներին: Ծնորհիվ հարգարժան տիկին Իսկուհի Համբարձումյանի՝ երկու տասնյակից ավել մանուկներ և պատանիներ սովորել են հայերեն գրել, կարդալ: Ցավոք սրտի անձնական խնդիրների պատճառով տիկին Իսկուհու հետ համագործակցելն անհնար է դարձել, սակայն ի ուրախություն հայ համայնքի՝ հայոց լեզվի ուսուցչի դերում հանդես կգա հրաշալի մի հայուհի՝ Անի Գևորգյանը: Վերջինս հաճույքով ստանձնել է ուսուցչի պարտականությունները և ամեն կիրակի պատրաստ է իր ծառայությունները մատուցել կիրակօրյա դպրոց հաճախող սաներին:



Անի Գևորգյանը ծնվել է 1991թ. Երևանում, 2008թ. ավարտել է Դերենիկ Դեմիրճյանի անվան դպրոցը: 2008-2012թթ. ավարտել է Երևանի Հրաչյա Աճառյանի պետական համալսարանի մանկավարժության ֆակուլտետը: Ունի մանկավարժի կոչում: Աշխատանքային և ուսանողական գործունեությունը

համատեղել է Երևանում մասնավոր պարապմունքներով: Ինչպես նաև 2004-2008 թթ. սովորել և ավարտել է Երևանում Մոֆի Դևոյանի «Հոգու և Մշակույթի» պարի դպրոցը: Պրոֆեսիոնալ պարուհի է, նախընտրում է ազգագրական պարեր: Երկու տարուց ավել բնակվում է Մոսկվայում: Պարում է Մոսկվայի Հայորդիք անսամբլում, հայերենի մասնավոր դասեր է տալիս: Ամուսնացած չէ: Ապրում է ծնողների հետ:

**ՌՈՒՍԱՍՏԱՆՈՒՄ ՀԱՅ ԿԱԹՈՂԻԿԵ ՀԱՄԱՅՆՔԻ ՀՈԳԵՎՈՐ
ԱՌԱՋՆՈՐԴ ԾԱՅՐԱԳՈՒՅՆ ՎԱՐԴԱՊԵՏ ՀԱՅՐ ՊԵՏՐՈՍ
ՊԵՏՐՈՍՅԱՆԻ ՈՒՂԵՐՁԸ ՀԱՎԱՏԱՑՑԱԼՆԵՐԻՆ**

Հարգելի հայրենակիցներ, երկարատև արձակուրդից հետո



սկսում ենք մեր գործունեությունը՝ նոր նպատակներով և նոր գաղափարներով հարստացած: Մոսկվայի Հայ կաթողիկե համայնքի հոգևոր առաջնորդ Ծայրագույն վարդապետ հայր Պետրոս Պետրոսյանի անմիջական առաջնորդությամբ, Գերաշնորհ

Տեր Ռաֆայել Արքեպիսկոպոս Մինասյանի օրհնությամբ՝ հրավիրում ենք բոլորին աղոթքի պատերազմների, հիվանդությունների և մարդկության առջև ծառայած արդիական խնդիրների հաղթահարման համար: Հայ ժողովրդի համար 2015 թվականը բեկումնային տարի է, սա մի ժամանակահատված է, երբ աշխարհի բոլոր հայերը, անկախ իրենց գտնվելու տարածաժամանակային գործոններից, պետք է համախմբվեն մեկ նպատակի շուրջ որն է՝ վերջնակետի հասցնել հայի արդար պահանջը՝ Հայկական Հարցը: 1915 թվականին Օսմանյան Թուրքիայի կողմից հայ ժողովրդի հանդեպ իրականացված ոճրագործության հարյուրամյակի շեմին ենք, և ամբողջ աշխարհը

մեր երեսին է նայում: Հարկ է, որ հավուր պատշաճի ներկայանանք միջազգային ասպարեզում, և մեր ձայնը լսելի դարձնենք ամենուր: Կազմակերպվում են բազմազան պատմամշակութային, հոգևոր միջոցառումներ, գիտական կոնֆերանսներ և այլ ձեռնարկներ ամբողջ աշխարհում, որտեղ գոնե մեկ հայ կա: Մոսկվայի հայ կաթողիկե համայնքը ևս անմասն չի մնա: Ժողովրդապետարանի գործունեության ամենամյա ժամանակացույցում այս տարի մեծ ուշադրություն ենք հատկացրել Ցեղասպանության հարցի արձարժմանը և Եղեռնի հիշատակման միջոցառումներին: Կոչ ենք անում բոլորին ակտիվություն դրսևորել բոլոր ձեռնարկներին մասնակցելու ուղղությամբ:

Ինչպես մյուս տարիներին՝ ուշադրության կարժանանան ազգային և հոգևոր բոլոր տոները և հիշարժան ամսաթվերը: Պետք է նշել, որ ներկայումս ակտիվ աշխատանքներ են տարվում դեկտեմբեր ամսվա մեջ տեղի ունենալիք «ՄԵՐ ԵԿԵՂԵՑԻՆ ՄԵՐ ԵՐԵՒԱՆԵՐԻ ՀԱՄԱՐ» միջոցառման ուղղությամբ, որին ակնկալում ենք մեր համայնքի տաղանդավոր բոլոր երեխաների, պատանիների և երիտասարդների ակտիվ մասնակցությունը:

Ի ուրախություն պետք է նշել, որ բավականին մեծ է հետաքրքրությունը հայոց լեզվի ուսուցման հանդեպ, թե երեխաների և թե երիտասարդների շրջանակում:

Գրաձանաչության և Խոսքի զարգացման դասերին մասնակցել ցանկացողների թիվը հասնում է հիսունի, որը ի համեմատ անցած տարիների՝ բավականին մեծ ցուցանիշ է և խոսում է այն բանի մասին, որ ազգային ինքնության գիտակցությունը արթուն է: Կիրակի օրերին ժամը 11:00-ից մինչ 17:30 գործում է դպրոցը բոլոր ցանկացողների համար:

Աղոթենք միասին, որ մեր ընտանիքներում թագավորեն առողջությունը, խաղաղությունը, սիրով և միաբան լինենք, միշտ պատրաստ փոխըմբռնման, ներենք և ընդառաջ գնանք միմյանց. միայն այդ ժամանակ ներդաշնակություն կլինի մեր սրտերում և մեր փոխհարաբերություններում: Թե դժվարության և թե ուրախության ժամանակ հիշենք Մայր Եկեղեցին, որը տունն է ամենքիս, որտեղ միշտ կարող ենք գտնել սփոփանք, մխիթարանք, հոգեկան հավասարակշռություն և խաղաղություն:

Օրհնյալ լինեք Սուրբ Հոգու շնորհներով, ապրեք խաղաղությամբ, և Տերը թող ամենքիդ հետ լինի: Ամեն

Ծայրագույն Վարդապետ Հայր Պետրոս Պետրոսյան

Մոսկվա 5 հոկտեմբերի 2014թ.

